

之不周將爲犁鋤所及吾子孫不孝之誅何以自贖九五府君生三子長萬一府君次萬四府君皆絕又次萬三二府君諱汝明字叔晦是於表元爲祖始去小方門別居坊縣絲綿行妣曰鄭氏千十夫人諱如玉初六四府君之六子有十二孫九一府君之季子諱簡字簡之最後以毛氏詩爲待補太學弟子員一人九八府君之長子萬廿九府君諱杰字願仲又字良英太學上舍附甲戌進士乙科仕至宗學武學諭出倅温州終於奉議郎主管華州雲臺觀次子萬三三府君諱杏字懷英魁丙子鄉貢終於禮部特奏名其子謙四府君諱頓字平甫復入乙未太學先祖府君獨朴曾有至性兄弟間以房院擁隘羣議出婿于鄭夫人夫人善父先生諱一枝妹也善父先生以詞賦教授里中有重名鄉舉十四人時預其

高選鄭夫人督警又嚴甥孫緣外家故始皆改用詞賦業府君生丙申七月十日亥時年七十九卒甲寅十一月二十七日夫人生庚戌五月二十日辰時年八十五卒甲戌八月十二日刻源張村別有記府君生五子長再十六府君諱濤字默叟性貌酷類先祖舊法中朝官三歲得牒上其族子弟名之在總功親者試國子監試中補國子生府君以伯父武諭牒至杭試一不中卽罷業晚歲自號拙逸居士生庚午五月六日辰時年七十七卒乙酉八月二十一日妣曰袁氏三八夫人生丙寅八月十五日子時年五十卒乙卯九月七日次再十八府君諱灝字商叟生庚辰三月二十九日卯時年六十五卒甲申七月十九日次再十九府君諱頤字子美次再二十府君諱南一字梅叟次再廿一府君諱須凡七孫在者